

# Mi tata

Di infansia m'a konosé bo.

Semper bo a disipliná. Semper bo a perkurá.

Si tin un problema solushon b'a perkurá.

Pa konseho na bo tabata akudí

Semper ku hopi pasenshi i amor bo a rasoná.

Nos no tabatin nodi di preokupá.

Pero asin'ei añanan a pasa. Muchu lihé bo a deskonektá.

Te ainda ta difísil pa kustumbrá ku mentalmente bo no t'ei mas.

Mi no sa si bo ta realisá, mi no sa ki eksperensia bo tin, mi no sa si konsiente bo ta.

Tur dia mesun problema, en buska di e yab'i outo bo ta.

Kosnan ku pa nos ta kustumber di tur dia, tur dia di nobo bo ta eksperensia nan.

Deskonfiansa den bo abilidadnan bo tin.

Pero alabes un ternura ineksplikabel bo ta manifestá. Hopi tierno bo ta.

Mare mi por stòp bo di lubidá.

Mare mi por tene bo ankrá den e realidat.

Frustrá mi ta. Rabiá mi ta. Impotente mi ta. Nada mi no por hasi. Atras bo ta bai.

Alabes mi tin ku komprende ku apesar di tur e sintimentunan ku mi ta eksperensia,  
di bo ta esun ku ta importá.

Dios duna mi pasenshi pa soportá.

Pa balorá bo manera bo ta, pasobra nunca lo bo stòp di ta mi tata stimá.

Poeta: Saiveca Conradus

Título di poema: Mi tata

Edat: 40

Pais di residensia: Curaçao

Derecho di outor: Saiveca Conradus.